

CONVENIO DE COLABORACIÓN ENTRE A CONSELLERÍA DO MEDIO RURAL, AXENCIA GALEGA DA INDUSTRIA FORESTAL E A FUNDACIÓN SEMANA VERDE DE GALICIA PARA A ORGANIZACIÓN DA V EDICIÓN DA FEIRA BIENAL GALIFOREST

En Santiago de Compostela, a 27 de xuño de 2018

REUNIDOS

Dunha parte, D. Alfonso Rueda Valenzuela, Vicepresidente e Conselleiro de Presidencia, Administracións Públicas e Xustiza da Xunta de Galicia, e Presidente do Padroado da Fundación Semana Verde de Galicia, que actúa no seu nome e representación, ao amparo das facultades que se lle confiren no artigo 13 dos Estatutos da Fundación, e segundo o acordado na reunión do Padroado do 28 de Agosto de 2008, nos termos e condicións atribuídas polo Padroado; con CIF G-36.155.208, domiciliada en Silleda (Pontevedra) no Recinto Feiral s/n.

Doutra parte, D. Francisco José Conde López, Conselleiro de Economía, Emprego e Industria da Xunta de Galicia e Presidente da Axencia Galega da Industria Forestal, con NIF Q1500422I, e domicilio na Avda. Fernando de Casas Novoa, 38 San Lázaro, 15707 Santiago de Compostela, que actúa como presidente da citada Axencia de acordo co establecido polo Decreto 81/2017, do 3 de Agosto, polo que se crea a Axencia Galega da Industria Forestal e se aproban os seus estatutos.

E doutra parte D^a Ángeles Vázquez Mejuto, Conselleira do Medio Rural da Xunta de Galicia, segundo o Decreto 148/2016, do 13 de novembro, polo que se nomean os titulares dos departamentos da Xunta de Galicia, (DOG núm. 217 do 14.11.2016) que actúa en nome e representación desta Consellería por avocación segundo o disposto no artigo 7 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

Cada un intervén en función do seu cargo, no exercicio das facultades que para convir en nome das entidades que representan teñen conferidas, recoñecéndose mutua e respectiva competencia e capacidade suficiente para formalizar o presente convenio de colaboración.

EXPOÑEN

Primeiro. Que o Estatuto de Autonomía establece no seu artigo 27.10 a competencia exclusiva da Comunidade Autónoma en materia de montes e aproveitamentos forestais sen prexuízo do disposto no artigo 149.1.23 da Constitución.

Segundo. Que a Xunta de Galicia por medio do Decreto 135/2017, do 28 de decembro, polo que se establece a estrutura orgánica das Consellería de Economía, Emprego e Industria, asígnalle á mesma as competencias asociadas á industria forestal. E, é por medio de, entre outros, o Decreto 166/2015, do 13 de novembro, polo que se aproba a estrutura orgánica da Consellería do Medio Rural, e da Orde do 17 de novembro de 2015 de delegacións de competencias en diversos órganos da Consellería do Medio Rural, que se asignaron as competencias en materia de montes e aproveitamentos forestais á Dirección Xeral de Ordenación Forestal.

Terceiro. Que a Consellería do Medio Rural e a Axencia Galega da Industria Forestal consideran accións necesarias para acadar obxectivos da política forestal e da política industrial a divulgación de coñecementos e de técnicas de xestión forestal sostible e a actualización técnica dos propietarios de montes e comunidades de montes veciñais de Galicia.

Cuarto. A Fundación Semana Verde de Galicia é unha institución sen fin de lucro creada no 1991, declarada de interese galego. A Fundación ten entre os seus fins:

1. Contribuír ao desenvolvemento do sector agrario galego, a través de actividades feirais e de mercados agropecuarios.

2.Promover a cooperación público-privada no desenvolvemento de actividades feirais e promocionais no campo agrario, alimentario, industrial e comercial co obxecto de impulsar o avance continuo dos devanditos sectores.

3.Reforzar a posición estratéxica de Galicia como plataforma feiral para o desenvolvemento de grandes eventos sectoriais de ámbito estatal e internacional.

A Fundación organiza o 100% da oferta feiral profesional de Galicia centrada nos sectores forestal e agrogandeiro e o 95% no terreo agroalimentario. A labor da Fundación Semana Verde de Galicia, nestes campos, conta cun grande recoñecemento.

Quinto. Que a explotación e o aproveitamento dos recursos son parte esencial do sector forestal galego e que reiteradas demandas dende o mesmo reclamaron a organización dun novo Salón profesional centrado nestes dous aspectos.

Neste senso, organizado pola Fundación Semana Verde de Galicia, Galiforest convocou por primeira vez ao sector forestal en xuño de 2010 no Centro de Formación e Experimentación Agroforestal de Sergude. Dende entón a Fundación ten organizado o certame nas seguintes tres edicións, por tratarse da única entidade con experiencia e capacidade para a organización e xestión de eventos relacionados coa oferta feiral profesional de Galicia centrada nos sectores forestal, agrogandeiro e agroalimentario.

O V Monográfico Forestal Internacional para o Sur de Europa, Galiforest, será un salón dirixido a profesionais nun escenario singular, unha exposición dinámica no monte en condicións reais de traballo, correspondendo a súa organización como nas edicións anteriores á Fundación Semana Verde de Galicia.

O evento celebrarase entre o 28 e o 30 de xuño, no monte e instalacións do Centro de Experimentación Agroforestal de Sergude (Boqueixón), que constitúe un lugar con condicións reais de traballo e ao mesmo tempo atópase moi ben conectado cara á asistencia do público interesado. Conta con axeitadas infraestruturas para as xornadas, e masas forestais para demostracións, tanto para as grandes máquinas como para visitantes, entradas asfaltadas, parkings, edificacións..

Trátase de xerar un espazo de encontro forestal que posibilite a xeración de negocio, innovación e divulgación tanto técnica como social. O certame contará cunha gran área expositiva e cun programa de demostracións e xornadas técnicas, dirixíndose a un público con perfil profesional, se ben aberto a calquera tipo de público. Desenvolvéndose nun entorno real para o traballo forestal, o monte. O certame ocupará unha superficie aproximada dunha hectárea, e se espera a asistencia dunhas 180 firmas expositoras procedentes de máis de 15 países e unha afluencia media duns 2.000 visitantes diarios.

Permitirá ás empresas forestais levar a cabo probas de desbroces, astelados, tala de madeira, apiado de produtos, carga directa en camión o indirecta en autocargadores, transporte de madeira no monte, sementeira mecánica, aproveitamento de residuos forestais (biomasa), etc., nas que participarán empresas de todo o sector produtivo, tanto fabricantes, como distribuidores de motoserras, grúas, autocargadores, vehículos de transporte, etc. Na última edición programáronse máis de 100 demostracións de maquinaria, que se realizaron de maneira continuada e nas que se puido ver todo tipo de traballos forestais, e máis de 20 xornadas técnicas sobre temas de actualidade e interese para o sector forestal, estando previsto manter ou mellorar estas cifras na presente edición.

Sexto. É vontade da Consellería do Medio Rural e da Axencia Galega da Industria Forestal colaborar conxuntamente coa Fundación Semana Verde na realización das actividades de organización do V evento monográfico forestal internacional para o sur de Europa mencionado no expoñendo quinto.

A Fundación é a única entidade con experiencia e capacidade suficiente para a organización e xestión de eventos relacionados coa oferta feiral profesional de Galicia centrada nos sectores forestal, agrogandeiro e agroalimentario, estando estas actividades especificamente recollidas nos fíns fundacionais da entidade. Por este motivo para a quinta edición, propónse a sinatura dun convenio de colaboración coa Fundación Semana Verde de Galicia, por non ser viable promover a concorrència competitiva neste eido.

As partes acordan asinar o presente convenio de colaboración segundo as seguintes:

CLÁUSULAS

Primeira. Obxecto.

O obxecto deste convenio é regular as condicións da colaboración conxunta entre a Consellería do Medio Rural, a Axencia Galega da Industria Forestal e a Fundación Semana Verde para a organización neste ano dunha nova edición da feira bienal de carácter monográfico forestal internacional para o sur de Europa que ten como obxectivos principais os seguintes:

- 1.Ser punto de encontro e referencia profesional para o sector
- 2.Consolidación como feira profesional monográfica no ámbito xeográfico do Suroeste da Unión Europea.
- 3.Promocionar a estrutura empresarial e produtiva do sector.
- 4.Fomentar unha conciencia social a favor do medio ambiente e os seus recursos.
- 5.Promover as boas prácticas no uso da maquinaria forestal.

Segunda. Compromisos da Fundación Semana Verde de Galicia

A Fundación Semana Verde, ao seu cargo, asume as seguintes obrigas:

1. Involucrar ao sector forestal na realización do evento. Para iso divulgará e invitará a participar ás entidades vinculadas aos diferentes campos do sector.
2. Promover acordos con diferentes organismos como ICEX, Igape, Cámaras de Comercio, Asociacións Profesionais para a realización de misións comerciais que darán o carácter internacional a este monográfico.
3. Promover acordos con diferentes empresas líderes, para traer aos principais fabricantes internacionais.
4. Lanzamento dunha campaña de comunicación que destaque as novidades e os elementos diferenciais do certame.
5. Destinar unha zona equipada con carpa, stand e mobiliario no certamen Galiforest 2018 para a difusión das políticas desenvolvidas pola Consellería do Medio Rural.

6. Destinar una zona equipada con carpa, stand e mobiliario no certame Galiforest 2018 para a difusión das políticas desenvolvidas pola Axencia Galega da Industria Forestal.

Terceira. Compromisos da Consellería do Medio Rural

A Consellería do Medio Rural, por medio do persoal técnico da Dirección Xeral de Ordenación Forestal, cooperará efectivamente no desenvolvemento da organización do evento, intervindo activamente na realización do mesmo, de forma que o resultado beneficie e teña proveito para as dúas partes sen que exista ánimo de lucro para ningunha delas.

A Consellería asume as seguintes obrigas:

1. Asumir a Presidencia do Comité de Galiforest na figura do director xeral de Ordenación Forestal.
2. Achegar persoal técnico en temas forestais que colaborará conxuntamente coa Fundación:
 - Na organización de conferencias e mesas redondas sobre o sector.
 - Participando presencialmente en varias conferencias e mesas
 - Presentando os eventos máis destacados da feira
3. Achegar material de divulgación sobre temas relacionados co monte, o medio ambiente e a prevención e loita contra os incendios forestais.
4. Facer un seguimento e análise dos resultados da feira.

Cuarta. Compromisos da Axencia Galega da Industria Forestal

A Consellería de Industria, por medio do persoal da Axencia Galega da Industria Forestal, cooperará efectivamente no desenvolvemento da organización do evento, intervindo activamente na realización do mesmo, de forma que o resultado beneficie e teña proveito para as dúas partes sen que exista ánimo de lucro para ningunha delas.

A Axencia asume as seguintes obrigas:

1. Participar no Comité de Galiforest .
2. Achegar persoal técnico en temas da industria forestal que colaborará conxuntamente coa Fundación:
 - Na organización de conferencias e mesas redondas sobre o sector
 - Participando presencialmente en varias conferencias e mesas
 - Presentando os eventos máis destacados da feira
3. Achegar material de divulgación sobre temas da súa competencia.
4. Facer un seguimento e análise dos resultados da feira.

Quinta. Financiamento

A achega conxunta da Consellería do Medio Rural e da Axencia Galega da Industria Forestal será de setenta mil euros (70.000€), que se financiarán do seguinte xeito:

A consellería de Medio Rural financiará un gasto máximo de trinta e cinco mil (35.000€) con cargo á aplicación orzamentaria 13.02.713B.640.0 dos Orzamentos Xerais da Comunidade Autónoma de Galicia para 2018, e a Axencia Galega da Industria Forestal financiará un gasto máximo de trinta e cinco mil euros (35.000€), con cargo á aplicación orzamentaria .09.A4.741A.640.0 dos Orzamentos Xerais da Comunidade Autónoma de Galicia para 2018, sendo estas partidas económicas as axeitadas para asumir o custo desta acción por considerarse pola súa natureza como un investimento de carácter inmaterial que deberá incrementar o valor das políticas públicas acometidas polas Consellerías do Medio Rural e de Industria neste ámbito e que non dará lugar a investimentos reais que se poidan materializar en activos.

As colaboracións financeiras da Consellería do Medio Rural e da Axencia Galega da Industria Forestal neste convenio non terán o carácter de prezo, senón de achega que se realiza para compensar á Fundación Semana Verde de Galicia dos gastos nos que incorre no desenvolvemento e difusión do dito evento.

A Fundación Semana Verde remitirá ás partes asinantes un informe das actuacións realizadas ao abeiro do convenio, desde o seu comezo ata o momento da xustificación, que deberá ser aprobado previamente ao pagamento. O informe incluírá os documentos, informes e publicacións elaborados ao abeiro do convenio durante o período obxecto de xustificación. Igualmente achegaranse como medio de xustificación as facturas, correspondentes ás partidas financiadas que figuran no anexo, destinadas ao financiamento dos custes xustificadas que se deriven da realización das actuacións descritas, e que poderán incluír todos aqueles gastos que foran necesarios.

A totalidade da documentación xustificativa deberá remitirse ás partes antes do 3 de outubro de 2018. A Fundación Semana Verde de Galicia acompañará á xustificación dun informe final que recolla as actuacións realizadas ao abeiro do convenio, desde o seu comezo ata o seu fin, que deberá ser aprobado previamente ao pagamento. O informe final incluírá todos os documentos, informes e publicacións elaborados ao abeiro do convenio.

As achegas financeiras que se comprometan a realizar os asinantes non poderán ser superiores aos custos derivados da execución do convenio.

Dado que a Fundación Semana Verde iniciou en xaneiro de 2018 as actuacións para a organización do V Monográfico Forestal Internacional para o Sur de Europa, Galiforest, na xustificación das partidas que lle corresponde financiar á Fundación serán financiáveis ao abeiro do presente convenio aqueles custes que, de xeito indubidábel obedezan a actividades relacionadas coa súa execución, incluíndo custos laborais. Por parte da Consellería do Medio Rural e da Axencia Galega de Industria Forestal se financiarán os gastos nos que incorra a Fundación Semana Verde a partir da data de entrada en vigor do convenio.

Sexta. Réxime de persoal.

A sinatura deste convenio non implica relación laboral ou de calquera outro tipo entre os profesionais encargados de executar as actividades que constitúen o seu obxecto e a Consellería do Medio Rural ou a Axencia Galega da Industria Forestal, de tal xeito que non se poderá esixir a esta ningún tipo de responsabilidade, nin directa nin subsidiaria, polos actos ou feitos acaecidos no seu desenvolvemento, nin polos incumprimentos nos que puidera incurrir a fundación, nas súas relacións cos traballadores aos que encomende a realización do traballo. En consecuencia a Fundación Semana Verde de Galicia asumirá a posición de empresario ou contratante verbo de tales profesionais, e asumirá en exclusiva as obrigas e responsabilidades legais que a normativa legal e convencional lle impón verbo destes.

Sétima. Comisión de Seguimento.

Para a xestión do convenio de colaboración constituirase unha comisión de seguimento composta por dous representantes de cada institución asinante.

Esta comisión encargarase da xestión, seguimento das actuacións e avaliación dos resultados, e desenvolverase durante toda a duración do convenio de xeito continuado, establecendo e definindo as pautas de actuación e supervisando tecnicamente as accións previstas no mesmo. A comisión resolverá os problemas de interpretación e cumprimento que poidan xurdir durante a execución do convenio, conforme ao artigo 49.f) da lei 40/2015, do 1 de outubro, do réxime xurídico do sector público.

A comisión, a petición da Fundación Semana Verde, poderá aprobar modificacións entre as partidas de gastos financiados consignadas no anexo I, sen que en ningún caso as ditas modificacións supoñan nin incremento do gasto máximo financiado por cada parte asinante, nin modificación das aplicacións orzamentarias establecidas na cláusula quinta deste convenio.

Oitava. Resolución

Son causas de resolución do presente convenio:

- O incumprimento total ou parcial dalgunhas das súas cláusulas.
- O transcurso do tempo estipulado sen que se culminen as actividades acordadas.
- As modificacións das directrices de desenvolvemento sen contar coa previa autorización escrita das partes asinantes.

Novena.- Protección e Seguridade da Información

No desenvolvemento do presente convenio adoptaranse e respectaranse as medidas de seguridade requiridas pola Lei Orgánica 15/1999, de 13 de decembro, de Protección de Datos de Carácter Persoal, e o seu Regulamento de desenvolvemento.

Décima. Réxime

Este convenio ten natureza administrativa e rexerase pola Lei 40/2015, do 1 de outubro, do réxime xurídico do sector público. Atópase excluído do ámbito de aplicación da Lei 9/2017, do 8 de novembro, de Contratos do Sector Público, pola que se transpoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014.

Décimo primeira.- Transparencia e Rexistro

As partes asinantes deste convenio outorgan o seu consentimento para que os datos persoais e o resto das especificacións que constan no citado convenio sexan publicados no Portal de Transparencia e Goberno Aberto e no Rexistro de Convenios da Xunta de Galicia, de acordo co establecido no artigo 15 da Lei 1/2016, do 18 de xaneiro, de transparencia e bo goberno, no Decreto 126/2006, do 20 de xullo, polo que se regula o Rexistro de Convenios da Xunta de Galicia, e en concordancia cos artigos 14 e seguintes da Lei 19/2013, do 9 de decembro, de transparencia, acceso á información pública e bo goberno.

Décimo segunda. Controversias.

As cuestións litixiosas xurdidas sobre a interpretación, modificación, resolución e efectos que puideran derivarse da aplicación do presente convenio deberán solventarse pola comisión de seguimento á que se refire a cláusula sétima do presente convenio.

A xurisdición contenciosa administrativa será competente para o coñecemento de posibles cuestións litixiosas que poidan suscitarse.

Décimo terceira. Vixencia.

O convenio de colaboración entrará en vigor ao día seguinte da súa sinatura e rematará o 3 de outubro de 2018.

E, en proba de conformidade, asinan, por triplicado, o presente convenio de colaboración no lugar e data indicados no encabezamento.

O Presidente do Padroado da
Fundación Semana Verde de Galicia

O Presidente da Axencia Galega da
Industria Forestal

Alfonso Rueda Valenzuela
A Conselleira do Medio Rural

Francisco José Conde López

Ángeles Vázquez Mejuto



ANEXO I

RELACIÓN DE GASTOS FINANCIADOS EN GALIFOREST 2018

Financiación da Consellería do Medio Rural:

Plan de Medios:	12.000 €
Campaña de comunicación en prensa, revistas técnicas, radio, televisión, internet,...	
Montaxes propios:	13.000 €
Adecuación e preparación da zona, montaxe de carpas, instalación eléctrica, sonorización da zona,...	
Vixilancia e seguridade:	2.000 €
Durante a feira, así como durante a montaxe e desmontaxe, en turnos de día e noite	
Servizos varios de loxística:	3.000 €
Plan de emerxencias e control da súa execución, servicios médicos, de restauración,...	
Alugueros:	1.500 €
Aseos químicos, xeneradores de enerxía, carretillas, manitou,...	
Servizos de limpeza:	1.000 €
Durante a feira, así como durante a montaxe e desmontaxe. Inclúense os produtos de limpeza e a retirada de vertidos	
Señalización, cartelería e outro material gráfico:	500 €
Costes laborales: Coste laboral para comercialización y montajes	0 €
Montaje e equipamento stand Consellería	2.000 €
Total gastos financiados:	35. 000€



Financiación da Axencia Galega da Industria Forestal:

Plan de Medios:	12.000 €
Campaña de comunicación en prensa, revistas técnicas, radio, televisión, internet,...	
Montaxes propios:	13.000 €
Adecuación e preparación da zona, montaxe de carpas, instalación eléctrica, sonorización da zona,...	
Vixilancia e seguridade:	2.000 €
Durante a feira, así como durante a montaxe e desmontaxe, en turnos de día e noite	
Servizos varios de loxística:	3.000 €
Plan de emerxencias e control da súa execución, servicios médicos, de restauración,...	
Alugueros:	1.500 €
Aseos químicos, xeneradores de enerxía, carretillas, manitou,...	
Servizos de limpeza:	1.000 €
Durante a feira, así como durante a montaxe e desmontaxe. Inclúense os produtos de limpeza e a retirada de vertidos	
Señalización, cartelería e outro material gráfico:	500 €
Costes laborales: Coste laboral para comercialización y montajes	0 €
Montaje e equipamento stand Axencia	2.000 €
Total gastos financiados:	35. 000€



Financiación da Fundación Semana Verde De Galicia:

Plan de Medios:	3.000 €
Campaña de comunicación en prensa, revistas técnicas, radio, televisión, internet,...	
Montaxes propios:	1.000 €
Adecuación e preparación da zona, montaxe de carpas, instalación eléctrica, sonorización da zona,...	
Vixilancia e seguridade:	1.000 €
Durante a feira, así como durante a montaxe e desmontaxe, en turnos de día e noite	
Servizos varios de loxística:	500 €
Plan de emerxencias e control da súa execución, servicios médicos, de restauración,...	
Alugueros:	1.000 €
Aseos químicos, xeneradores de enerxía, carretillas, manitou,...	
Servizos de limpeza:	500 €
Durante a feira, así como durante a montaxe e desmontaxe. Inclúense os produtos de limpeza e a retirada de vertidos	
Señalización, cartelería e outro material gráfico:	1.700 €
Costes laborales: Coste laboral para comercialización y montajes	30.000 €
Montaje e equipamento stand FSVG	0 €
Total gastos financiados:	38.7000€

Orzamento total do V Monográfico Forestal Internacional para o Sur de Europa: 108.700 €.

As achegas financeiras da Consellería do Medio Rural e da Axencia Galega da Industria Forestal neste convenio non terán o carácter de prezo nin existe ningún ánimo de lucro por parte da Fundación Semana Verde de Galicia.